

आकाशवाणी जयपुर-अजमेर

- प्रधानमंत्री नरेन्द्र मोदी आज पश्चिम बंगाल मांय मालदा रेलवे स्टेशन ऊं देश री पहली वंदे भारत स्लीपर रेलगाड़ी ने झण्डी बता र रवाना कीनी।
- मुख्यमंत्री भजनलाल शर्मा 'पीएम सूर्यघर योजना' रो काम तेजी ऊं करण सारू अहलकारां ने कैशलेस मॉडल माथे काम करण रा हुकम दीना।
- राजस्थान हाईकोर्ट आरटीई रा तैत गैर-सरकारी स्कूलां मांय प्री-प्राइमरी कक्षा ऊं ई माली तौर ऊं कमजोर पिरवारां रा बच्चां सारू एक चौथाई सीटां राखण रा हुकम दीना।
- प्रदेश मांय घणखर ठौड़ां पारो चढ़बा ऊं ठारी ऊं साता मिली।

00000

प्रधानमंत्री नरेन्द्र मोदी देश री पहली वंदे भारत स्लीपर रेलगाड़ी ने आज पश्चिम बंगाल रा मालदा रेलवे स्टेशन ऊं हरी झंडी बता र रवाना कीनी। आ गाड़ी पश्चिम बंगाल रा हावड़ा अर आसाम रा कामाख्या बीचे चालेला। श्री मोदी गुवाहाटी-हावड़ा वंदे भारत स्लीपर गाड़ी ने ई वर्चुअल तरीका ऊं झण्डी बता र रवाना कीनी। ई मौके प्रधानमंत्री कह्यो के ई स्लीपर वंदे भारत रेलगाड़ी मांय सफर करण वाळा मुसाफिर घणा राजी व्हेला।

पूरी ए.सी. वंदे भारत स्लीपर गाड़ी मांय मुसाफिरां ने किफायती भाड़ा माथे हवाई यात्रा सरीखो एहसास व्हेला। इण ऊं लंबी दूरी रो सफर तेज़, सुरक्षित अर बत्ता सुबीता वाळो बणेला। 16 डिब्बा री ई गाडत्री मांय 823 मुसाफिर सफर कर सकेला।

000

मुख्यमंत्री भजनलाल शर्मा 'पीएम सूर्यघर योजना' रा तैत डोढ़ सौ यूनिट मुफ्त बिजली रो लक्ष्य हासिल करण सारू अहलकारां ने कैशलेस मॉडल माथे काम करण रा हुकम दीना है। वे आज जयपुर मांय 'राज उन्नति' री समीक्षा बैठक मांय बोल रह्या हा। श्री शर्मा कह्यो के राजस्थान ने सूरज रोशनी ऊं बिजली बणावण रा हलका मांय देश रो सिरमौर बणावण माथे खास ध्यान देवणो है। वे करीब दो हजार करोड़ रुप्या रा खर्च वाळी विकास परियोजनावां ने टेमसर पूरा करण रा हुकम दीना। वे जयपुर कने हीरापुरा बस टर्मिनल माथे नुवा सुबीता विकसित करण अर अजमेर-चंदेरिया रेल लाइन ने दोवड़ी बणावण सारू जमीं लेवण रा काम मांय तेजी रा हुकम ई दीना।

000

उपमुख्यमंत्री दिया कुमारी पी.डब्ल्यू.डी. रा अहलकारां ने आवता तीन दिन तांई मौके जा र जमीनी जरूरतां री ठा कर र वां रा आधार ऊं बजट प्रस्ताव बणावण रा हुकम दीना है। वे आज जयपुर मांय पी.डब्ल्यू.डी. री प्री-बजट समीक्षा बैठक मांय बोल रही ही। वे कह्यो के आवण-जावण ने आसान बणावण अर जनता ने तुरत साता देवण सारू जरूरी सड़कां बणावण री परियोजनावां तैयार करी जावणी चाहिजे।

000

जोधपुर आई.आई.टी. रा वैज्ञानिक पाणी री कमी रो सामो करण सारू नुवी तकनीक विकसित कीनी है। मैकेनिकल इंजीनियरिंग विभाग री एसोसिएट प्रोफेसर डॉ. शोभना सिंह वां री टीम सागे आर्टिफिशियल इंटेलिजेंस ऑफ थिंग्स माथे आधारित स्मार्ट जल प्रबंधन प्रणाली विकसित कीनी है। म्हाणा जोधपुर खबरनवीस बतायो के ई रे मार्फत मौके ई पाणी री निगराणी अर बेहतर प्रबंधन कर्यो जा सकेला।

.....

000

हज रा मुकद्दस सफर माथे जावण री प्रक्रिया पूरी करण री मियाद बधा र 25 जनवरी कर दीरी ज्यी है। अल्पसंख्यक मामलात मंत्रालय हज सारू जावण वाळां ने बुकिंग अर दूजा कागजात पूरा करण री राय दीनी है। महकमो नुसुक पोर्टल माथे रजिस्ट्रेशन करावण बाबत् ई कह्यो है।

0000

राजस्थान हाईकोर्ट री जोधपुर मुख्यपीठ शिक्षा का अधिकार-आरटीई रा तैत गैर-सरकारी स्कूलां मांय दाखिला रा बारा मांय खास फ़ैसलो दीनो है। अदालत प्री-प्राइमरी कक्षावां लगावण वाळी गैर-सरकारी स्कूलां मांय दाखिला रो सरूआती स्तर आं कक्षावां ने मानण री व्यवस्था दीनी। ऐडी स्कूलां ने ई लेवल माथे ई वंचित अर कमजोर तबका रा बच्चां सारू एक चौथाई सीटां राखणी व्हेला। न्यायमूर्ति विनीत कुमार माथुर अर न्यायमूर्ति चंद्रशेखर शर्मा री खंडपीठ व्यवस्था दीनी के स्कूल केवल पहली कक्षा ऊं मान्यता व्हेवण रो तर्क दे र आरटीई नियमां ऊं नी बच सके है। अदालत राज्य सरकार ने ई फ़ैसला रे मुजब नुवो सर्कुलर जारी करण रा हुकम दीना।

0000

प्रदेश री सगळी सरकारी स्कूलां मांय 23 जनवरी ने अध्यापकां अर विद्यार्थियां रा मायतां बीचे 'मेगा पीटीएम' राख्यी जावेला। इण री तैयारियां रो जायजो लेवण सारू शिक्षा शासन सचिव कृष्ण कुणाल आज अहलकारां सागे मीटिंग कीनी। वे 20 जनवरी ताई जरूरी व्यवस्थावां पूरी करण रा हुकम दीना। ई खास शिक्षक-अभिभावक बैठक ने मुख्यमंत्री भजनलाल शर्मा ई संबोधित करेला। ई मौके विद्यार्थियां ने मुफ्त साइकिलां, ट्रांसपोर्ट वाउचर अर बालिका शिक्षा फाउंडेशन री न्यारी-न्यारी योजनावां रो फायदो दियो जावेला। श्री कुणाल विद्यार्थियां रा मायतां ऊं ई मीटिंग मांय जरूर जावण री अरज कीनी।

000

राज्य मांय मुख्यमंत्री युवा स्वरोजगार योजना रे जरिये एक लाख नौजवानां ने कारोबारी बणाया जावेला। ई रा तैत नान्हा उद्यम लगावण सारू 10 लाख रुप्या ताई रा बिना ब्याज रा कर्ज मुहैया कराया जावेला, जिण रो ब्याज राज्य सरकार भरेला। उद्योग मंत्री राज्यवर्द्धन सिंह राठौड़ आज ई योजना रा नियमां री जाणकारी दीनी। वे बतायो के योजना रा तैत बणाई-चुणाई, सेवा अर कारोबार हलका मांय खुद रो काम-धंधो सरू करण भणाई-लिखाई रा आधार ऊं कर्ज दिया जावेला। स्नातक अर आईटीआई पास नौजवानां ने 10 लाख, जदके 8वीं ऊं 12वीं कक्षा पास उम्मीदवारां ने साढे सात लाख रुप्या ताई रा कर्ज दिया जावेला।

000

भरतपुर मांय 21 ऊं 28 जनवरी ताई 'राज सखी मेळा' भरेला। जिला कलेक्टर कमर चौधरी आ जाणकारी दीनी। वे बतायो के महिलावां ने मजबूत बणावण सारू कर्या जा रह्या जतन रा तैत लगाया जा रह्या ई मेळा मांय खुद सेवक समूहां री महिलावां री ओर ऊं हाथ ऊं बण्या सामान री प्रदर्शनी लगायी जावेला।

000

सवाईमाधोपुर रो 263वों स्थापना दिवस समारोह आज त्रिनैत्र गणेश मिन्दर मांय महाआरती सागे सरू व्हयो। म्हाणा खबरनवीस बतायो के महाआरती पाछे दशहरा मैदान मांय मांडणा अर पेंटिंग बणावण री होडां राख्यी ज्यी।

000

सहकारिता राज्य मंत्री गौतम कुमार दक आज जयपुर मांय 'सहकार संगम' कार्यक्रम री सरूआत कीनी। ई मौके वे कह्यो के प्रधानमंत्री नरेन्द्र मोदी री 'सहकार से समृद्धि' री सोच रे मुजब

सहकारी समितियां ने माली तौर ऊं मजबूत बणावण माथे सरकार खास ध्यान दे रही है। ई मौके वे सामाजिक सरोकार निभावण वाळा निरीक्षकां ने 'सहकार रत्न' पुरस्कार ऊं नवाजी ज्या अर 'सहकार स्तंभ' पत्रिका रो विमोचन कीनो। कार्यक्रम मांय प्रदेशभर रा सहकारी अहलकार अर निरीक्षक मौजूद रह्या।

000

प्रदेश मांय घणखर ठौडां पारो चढबा ऊं तेज ठण्ड ऊं साता मिली है। मौसम विभाग ऊं मिली जाणकारी रे मुजब पाली अर करौली मांय सब ऊं कम 3 दशमलव 8 डिग्री सेल्सियस तापमान दर्ज करी ज्यो। राजधानी जयपुर मांय पारो चढ र 10 दशमलव 4 डिग्री सेल्सियस नापी ज्यो। मौसम केन्द्र जयपुर रा निदेशक राधेश्याम शर्मा बतायो के आवता सप्ताह मौसम ओजू बदलेला।

0000

प्रधानमंत्री विश्वकर्मा योजना रा तैत कारीगरां अर शिल्पकारां ने समर्पित प्रदर्शनी 'प्रधानमंत्री विश्वकर्मा हाट काल नई दिल्ली मांय सरू व्हेला। इण रो मकसद देश री समृद्ध पारंपरिक शिल्प अर हस्तकला विरासत रो दरसाव करणो है। ई रे जरिये कारीगरां ने हाथ ऊं बणी सामग्री ने राष्ट्रीय अर अंतरराष्ट्रीय खरीदारां, हितधारकां अर जनता सामी पेश करण अर बेचण रो मौको मिलेला। देश रा सगळा राज्यां अर केंद्र रा राज वाळा प्रदेशां रा 100 ऊं बत्ता कारीगर इण मांय भाग लेवेला। प्रदर्शनी 31 जनवरी ताई खुली रेहवेला।

000

राष्ट्रमंडल देशां रा 120 सदस्यां रो संसदीय प्रतिनिधिमंडल आज जयपुर रो दौरा कीनो। ओ दल आमेर महल ने निरख्यो। ई दौरान लोक वाद्ययंत्र अर सांस्कृतिक प्रस्तुतियां माथे परदेशी पावणां रो खास ध्यान रहयो। परदेशी पावण आमेर रा किला रो ई दौरा कीनो अर शीश महल री बेजोड़ कारीगरी री सरावणा कीनी।

0000

श्रीगंगानगर मांय आज जिला विधिक सेवा प्राधिकरण री ओर ऊं महात्मा गांधी राजकीय विद्यालय रा विद्यार्थियां ने साइबर अपराधां ऊं बचाव रा बारा मांय जाणकारी दीनी। प्राधिकरण रा सचिव रवि प्रकाश सुथार विद्यार्थियां ने साइबर टगी ऊं बचाव सारू मजबूत पासवर्ड राखण अर ओ.टी.पी. किंण ई ने नी बतावण री राय दीनी। वे अण-जाण लिंक माथे क्लिक नी करण बाबत् ई कह्यो। वे बतायो के साइबर अपराध रा हालात मांय तुरत हेल्पलाइन नंबर 1930 माथे फोन कर र मदद ली जा सके है।

000